

Na osnovu člana 23 Statuta Brčko distrikta Bosne i Hercegovine, Skupština Brčko distrikta BiH, na 96. sjednici održanoj 22. jula 2004. godine, usvaja

## **Z A K O N**

### **O DOPUNSKIM PRAVIMA PORODICA POGINULIH BORACA I RATNIH VOJNIH INVALIDA**

#### **I. OSNOVNE ODREDBE**

##### Član 1

Ovim zakonom uređuju se dopunska prava porodica poginulih boraca i ratnih vojnih invalida i članova njihovih porodica, koja su u nadležnosti Brčko distrikta BiH, na način da se propisuju prava kojima se osigurava adekvatna socijalna zaštita populacije koju ovaj zakon obuhvata, te se utvrđuju uslovi i postupak za ostvarivanje tih prava.

#### **II. KORISNICI PRAVA**

##### Član 2

Korisnici ovih prava su porodice poginulih boraca i ratni vojni invalidi koji imaju pravovaljano rješenje o statusu porodice poginulog borca ili ratnog vojnog invalida izdato od nadležnog entitetskog ministarstva.

##### Član 3

Prava utvrđena ovim zakonom mogu ostvariti kategorije ratnih vojnih invalida navedeni u članu 2 ovog zakona koji žive na teritoriji Brčko distrikta.

#### **III. DOPUNSKA PRAVA PORODICA POGINULIH BORACA I RATNIH VOJNIH INVALIDA**

##### Član 4

Lica iz člana 2 ovog zakona, pod uslovima, na način i u obimu utvrđenim ovim zakonom, imaju slijedeća prava:

1. Zdravstvena zaštita, osiguranje potrebnih lijekova i sanitetskog materijala;
2. Medicinska rehabilitacija u lječilištima u zemlji i inostranstvu;
3. Naknada putnih troškova kod liječenja u inostranstvu;
4. Ortopedska i druga medicinska pomagala;
5. Prilagođavanje prilaza do stambene jedinice, javnih ustanova itd.;
6. Rješavanje stambene problematike dodjelom stanova ili sredstava za stambeno zbrinjavanje;
7. Prioritet prilikom zapošljavanja za članove uže porodice poginulog borca i ratnog vojnog invalida;
8. Prioritet kod upisa u obrazovne ustanove, stipendiranja, smještaja u đačke i studentske domove djece poginulih boraca i ratnih vojnih invalida;
9. Besplatne udžbenike za djecu poginulih boraca i ratnih vojnih invalida;
10. Prioritet kod obnove za porodice poginulih boraca i ratnih vojnih invalida čiji su stambeni objekti srušeni ili oštećeni u ratu;
11. Osiguravanje parking mjesta ispred javnih ustanova za invalide i njihovo propisno označavanje;
12. Naknada troškova sahrane.

## **(1) ZDRAVSTVENA ZAŠTITA**

### **Član 5**

Članovima porodice poginulog borca, ratnim vojnim invalidima i njihovim porodicama, pod uslovima predviđenim ovim zakonom, osigurava se zdravstvena zaštita koja se provodi kao:

- primarna,
- specijalističko-konsultativna i
- bolnička.

### **Član 6**

Korisnici imaju pravo na sve lijekove koji se nalaze na esencijalnoj listi zdravstva Brčko distrikta, te na druge lijekove koji su potrebni za liječenje posljedica ranjavanja ili bolesti kojima je uzrok ranjavanje. Za sve lijekove koji se izdaju po prethodno navedenim osnovama, korisnici su oslobođeni plaćanja participacije.

### **Član 7**

Korisnici prava iz člana 2 ovog zakona oslobođeni su plaćanja participacije u troškovima zdravstvene zaštite i liječenja u svim zdravstvenim ustanovama na području Distrikta Brčko. Korisnici prava iz ovog zakona imaju prioritet prilikom korištenja zdravstvenih usluga.

## **(2) MEDICINSKA REHABILITACIJA**

### **Član 8**

Ratni vojni invalidi upućuju se na banjsko-klimatsko liječenje u zemlji i inostranstvu kada je takvo liječenje nužno radi nastavka liječenja od zadobijenih povreda i bolesti prouzrokovanih ranjavanjem ili bolešću nastalom kao posljedica ranjavanja.

Teški ratni vojni invalidi - lica s paraplegijom imaju pravo jednom u kalendarskoj godini na banjsko liječenje u trajanju od 21 dan.

### **Član 9**

Prijedlog za banjsko-klimatsko liječenje daje nadležni doktor - specijalist na osnovu medicinske indikacije za istim, a banjsko-klimatsko liječenje odobrava nadležna komisija Odjeljenja za zdravstvo i ostale usluge.

## **(3) NAKNADA PUTNIH TROŠKOVA KOD LIJEČENJA U INOSTRANSTVU**

### **Član 10**

Korisnici prava iz člana 2 ovog zakona upućeni na liječenje i rehabilitaciju u inostranstvo imaju pravo na naknadu troškova prijevoza u visini iznosa povratne karte javnog prijevoza od mjesta prebivališta do mjesta u kom se provodi liječenje ili medicinska rehabilitacija.

Ratni vojni invalidi - lica s paraplegijom imaju pravo na adekvatan prijevoz do mjesta liječenja i nazad odgovarajućim sanitetskim vozilom ili na plaćanje troškova takvog prijevoza, ukoliko zdravstvo Brčko distrikta nije u mogućnosti izvršiti takav prijevoz.

## **(4) ORTOPEDSKA I DRUGA MEDICINSKA POMAGALA**

### **Član 11**

Ratnim vojnim invalidima osigurava se u medicinski indiciranim slučajevima ortopedska i druga medicinska pomagala, kada je to medicinski indicirano od nadležnog doktora specijaliste. Odobrenje za nabavku ortopedskih i drugih pomagala daje nadležna ljekarska komisija Odjeljenja za zdravstvo i ostale usluge. Ratni vojni invalidi oslobađaju se učešća u plaćanju ortopedskih i drugih pomagala.

## **(5) PRILAGOĐAVANJE PRILAZA DO STAMBENIH JEDINICA I JAVNIH USTANOVA**

### **Član 12**

Ratni vojni invalidi koji nisu sposobni za samostalno kretanje bez upotrebe invalidskih kolica ili drugih ortopedskih pomagala i slijepi ratni vojni invalidi imaju pravo na prilagođeni prilaz do mjesta stanovanja i do svih javnih ustanova gdje se ti prilazi mogu izvesti.

## **(6) RJEŠAVANJE STAMBENE PROBLEMATIKE**

### **Član 13**

Korisnici prava iz ovog zakona imaju pravo na rješavanje stambenih potreba, prema osnovama, mjerilima, kriterijima i postupcima za određivanje sredstava za te svrhe, utvrđenim aktom gradonačelnika.

## **(7) PRIORITET PRILIKOM ZAPOŠLJAVANJA**

### **Član 14**

Korisnici prava iz ovog zakona imaju prioritet prilikom zapošljavanja ukoliko ispunjavaju uslove za rad na tim radnim mjestima u skladu sa odgovarajućim zakonom. Organi uprave u Brčko distriktu, kao i sva pravna lica koja se finansiraju iz budžeta Brčko distrikta dužni su, pod jednakim uslovima, prilikom prijema u radni odnos osigurati prioritet članu porodice poginulog borca, kao i ratnim vojnim invalidima i članu uže porodice ratnog vojnog invalida.

## **(8) PRIORITET PRILIKOM ŠKOLOVANJA, STIPENDIRANJA ITD.**

### **Član 15**

Djeca lica iz člana 2 ovog zakona imaju prioritet prilikom upisa u obrazovne ustanove (srednje, više škole, fakultete) u skladu sa odgovarajućim aktom nadležnog organa - institucije. Uslov za primjenu ovog prava je da se ispuni bodovni minimum, odnosno da se zadovolji prijemni ispit na odgovarajućoj obrazovnoj ustanovi.

Djeca lica iz člana 2 ovog zakona, imaju prioritet prilikom odobravanja i dodjele stipendija, u skladu sa odgovarajućim aktom nadležnog organa.

Djeca lica iz člana 2 ovog zakona oslobađaju se plaćanja naknada u obrazovnim ustanovama.

## **(9) BESPLATNI UDŽBENICI**

### **Član 16**

Djeca lica iz člana 2 ovog zakona imaju pravo na besplatne obavezne udžbenike za potrebe redovnog ili vanrednog školovanja u osnovnim i srednjim školama, te na visokim školskim ustanovama, pod uslovom da to isto pravo ne ostvaruju po nekom drugom osnovu.

Iznos sredstava potrebnih za nabavku udžbenika osigurava Odjeljenje za obrazovanje u Vladi Brčko distrikta.

## **(10) PRIORITET KOD OBNOVE STAMBENIH OBJEKATA**

### **Član 17**

Lica iz člana 2 ovog zakona imaju pravo na prioritet prilikom obnove u ratu stradalih stambenih objekata, ukoliko su oni vlasnici stambenih objekata predviđenih za obnovu.

## **(11) OBEZBJEĐIVANJE PARKING MJESTA ISPRED JAVNIH USTANOVA ZA INVALIDE**

### **Član 18**

Ratni vojni invalidi imaju pravo na propisno označen parkirališni prostor za invalide ispred svih javnih ustanova gdje je moguće napraviti isti.

Ratni vojni invalidi prilikom korištenja parking prostora za invalide moraju na automobilu imati propisnu invalidsku oznaku.

Prilikom korištenja parking prostora oslobođeni su plaćanja naknade za parkiranje.

## **(12) NAKNADA TROŠKOVA SAHRANE**

### **Član 19**

U slučaju smrti lica iz člana 2 ovog zakona, članovi uže porodice koji sahrane umrlog imaju pravo na naknadu troškova sahrane (pogrebnih troškova), ukoliko to pravo ne mogu ostvariti na drugi način.

Pod troškovima iz prethodnog stava smatraju se troškovi prijevoza – prijenosa umrlog, troškovi opremanja i ukopa.

### **Član 20**

Naknadu iz prethodnog člana svojom odlukom utvrđuje gradonačelnik, a na prijedlog nadležnog odjeljenja.

## **IV. NADLEŽNOST ZA RJEŠAVANJE PO ZAHTJEVIMA ZA OSTVARIVANJE PRAVA**

### **Član 21**

Poslove upravnog rješavanja u prvom stepenu o pravima i obavezama iz ovog zakona vršit će nadležna služba boračko-invalidske zaštite pri Odjeljenju za zdravstvo i ostale usluge Vlade Brčko distrikta BiH.

U drugom stepenu o pravima i obavezama iz ovog zakona, rješavat će Apelaciona komisija Vlade Brčko distrikta BiH.

## **V. OSTVARIVANJE I PRESTANAK PRAVA**

### **Član 22**

Lica iz člana 2 ovog zakona mogu ostvariti prava po ovom zakonu ukoliko ona ne ostvaruju po drugom osnovu.

### **Član 23**

Korisnik prava iz ovog zakona obavezan je prijaviti svaku nastalu promjenu koja povlači izmjenu ili gubitak prava, u roku od 15 dana od nastanka promjene.

Promjena statusa po ovom članu prijavljuje se Pododjeljenju za socijalnu zaštitu, Službi za boračko-invalidsku zaštitu u Vladi Brčko distrikta.

### **Član 24**

Prava utvrđena ovim zakonom mogu se koristiti dok postoje propisani uslovi za korištenje istih i ne mogu se nasljeđivati, niti se mogu prenositi na druga lica.

## VI. SREDSTVA ZA OSTVARIVANJE PRAVA

### Član 25

Finansijska sredstva za ostvarivanje prava utvrđenih ovim zakonom osiguravaju se budžetom Brčko distrikta BiH, za svaku fiskalnu godinu, a na prijedlog gradonačelnika.

### Član 26

Pri ostvarivanju prava iz ovog zakona gradonačelnik će, na prijedlog nadležnog odjeljenja, izraditi kriterije i primjenjivati slijedeće prioritete:

- djeca poginulih boraca bez oba roditelja i ratni vojni invalidi 100% kojima je za redovan život potrebna tuđa njega i pomoć I grupa;
- porodice poginulih boraca prema broju poginulih boraca i ratni vojni invalidi 100% II grupa;
- ratni vojni invalidi prema procentu invaliditeta III grupa;

### Član 27

Nadzor nad sprovođenjem ovog zakona i drugih propisa i akata, donesenih u skladu sa ovim zakonom, vrši nadležno odjeljenje Vlade Brčko distrikta BiH.

## VII. PRIJELAZNE I ZAVRŠNE ODREDBE

### Član 28

Gradonačelnik će na prijedlog nadležnih odjeljenja u roku od 3 (tri) mjeseca od dana stupanja na snagu ovog zakona donijeti akte iz svoje nadležnosti, predviđene ovim zakonom.

### Član 29

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta BiH».

Босна и Херцеговина  
БРЧКО ДИСТРИКТ  
**БОСНЕ И ХЕРЦЕГОВИНЕ**  
СКУПШТИНА БРЧКО ДИСТРИКТА

Bosna i Hercegovina  
BRČKO DISTRIKT  
**BOSNE I HERCEGOVINE**  
SKUPŠTINA BRČKO DISTRIKTA

Broj: 0-02-022-234/04  
Brčko, 22. juli 2004. godine

PREDSJEDNIK  
SKUPŠTINE BRČKO DISTRIKTA

**Mirsad Đapo, dipl. pravnik**